

Prèju de su late: semper su matessi anneu

Finas ocannu non b'at perunu acordu pro su prèju de su late, chi achicat € 0,60, lassende abertu unu problema chi paret chi non si podet issirinare.

Pro agatare istiba a sa crisi de su pastoriu, chi oramai durat dae tropu tempus, cheret a beru chi mudet sa politica regionale, a manera chi sa chistione de su prèju de su late siat s'èsitu de una politica prus lasca, chi a beru siat a tretu de dare un'inditu de crèschida a totu su pastoriu.

Sa garantzia de sa calidade de su frutu de sartu e de sa manera de lu produrre, una politica chi permitat de fàghere produtos noos, s'aunimentu de sos pastores e de su late, sunt sos elementos de prus importu chi podent garantire sa cumpetitividade de su pastoriu sardu.

A bandas de sas políticas de crèschida b'at bisòngiu de cumintzare un'àndala chi cunsentat de torrare a pessare e a ammodernare totu su pastoriu, isperende chi a totus intret in conca chi solu cun sos acordos e cun sos cuntratos si podet sarvare su pastoriu.

Intre industria e pastoriu, difatis, tocat de agatare un'acordu, si cherent campare ambos, unu acordu de filiera chi fagat cumbèniu a totus e no a una parte ebbia.

S'isperu de Confagricoltura est de arribare a unu cunfrontu a livellu regionale de totu sa filiera, chi depat finas inditare sos elementos pro arribare a fàghere su prèju de su late, gasi comente est prevìdidu a livellu natzionale.

Unu mecanismu, duncas, chi tèngiat contu de sos elementos reales de mercadu, chi siet craru, giustu e seguru e chi boghet a campu totu sos datos chi pertocant sa produtzione, sa trasformatzione e su cumèrtziu.

No ischimus, difatis, cantu late si produit, cantu late benit fatu a casu, cantu casu romanu si faghet, cantu si nde bendet a foras, a cantu si bendet, e in ue si bendet e cantu est galu a bèndere collidu in sos magasinis. In fines, non s'ischit nudda de cussos elementos chi depent intrare in cussu mecanismu chi cunsentit de arribare a unu prèju de mercadu de su late.

Pro otènnere custos datos tocat cantu in antis de fàghere mòere s'Osservatoriu de su cumpartu ovi-crapinu nàschidu a pustis de una delibera de sa Giunta Regionale de su 29.12.2009, ma chi finas a como no est istada praticada.

Confagricoltura Sardigna cheret abèrrere unu cunfrontu sèriu. E sos industriales? S'ant a chèrrere cunfrontare custa borta o ant a sighire a impònnere su prèju issoro isetende chi si che mòrgiat de su tou unu settore chi giai est moribundu?